

ՀՈՎՀ. ՍՏԵՓԱՆՅԱՆ

ՅՈՒԼԻ ՄԻԽԱՅԼՈՎԻՉ ՇՈԿԱԼՍԿԻ

Լենինգրադում, վախճանվեց Մովետական Միության հռչակավոր աշխարհագետ Յուլի Միխայլովիչ Շոկալսկին։ Նրա կյանքը, բազմակողմանի և բազմօգուտ գործունեությունը մեծ հետաքրքրություն են ներկայացնում յուրաքանչյուր աշխարհագետի համար։ Նա իր երկարամյա կյանքի ընթացքում մասնագիտացել էր գլխավորապես հիդրոլոգիայի և քարտեզագրության բնագավառներում։ 1877 թ. ավարտելով Պետերբուրգի Ծովային Ակադեմիան, Յուլի Միխայլովիչը, որպես հիդրոլոգ, իրեն նվիրում է նախկին Ռուսաստանի և ապա ՍՍՌՄ կանգուն ու հոսող ջրերի (ծովերի, լճերի, գետերի), երկրագնդի ջրային ընդարձակ տարածության, ըստ Շոկալսկու՝ «համաշխարհային օվկիանոսի»՝ ուսումնասիրության գործին։ Նա ուսումնասիրել է Ուրալից սկիզբ առնող գետերը, Վիչեգդան, հետադառել է Լադոգա լիճը, մասնակցել է Կասպից ծովի ուսումնասիրող էքսպեդիցիային (1924—27 թ.թ.), ղեկավարել է Սև ծովը նոր մեթոդներով ուսումնասիրելու աշխատանքները, կատարել է Ասիական Ռուսաստանի գետերի երկարությունների չափումները։ Նրա «Океанография» (Օվկիանոսագրություն) հռչակավոր աշխատությունը՝ մեծահատոր մոնոգրաֆիան, որն ավարտվել է 1917 թ., առաջինն էր Ռուսաստանում և արժանացել է Ռուսաստանի Գիտությունների Ակադեմիայի ու Փարիզի Ակադեմիայի բարձր մրցանակներին։

Յուլ. Մ. Շոկալսկին խոշորագույն աշխատանքներ է կատարել նաև քարտեզագրության և գեոդեզիայի բնագավառներում։ Տիլլոյի հետ Շոկալսկին կատարել է Ասիական Ռուսաստանի մակերեսի չափումը, 1905 թ. կազմել է Եվրոպական Ռուսաստանի քարտեզը՝ 1:2.000.000 մասշտաբով, խմբագրել է Ա. Ֆ. Մարքսի հրատարակությամբ լույս տեսած հայտնի մեծադիր ատլասը, 1913 թ. կազմել է Ասիական Ռուսաստանի գիսսոմետրիկ քարտեզը՝ 1:2.500.000 մասշտաբով, կազմել է Մովետական Միության Ասիական մասի ռելյեֆ քարտեզը, Հյուսիսային բևեռային շրջանների ֆիզիկական քարտեզը։

Շոկալսկին ամենաառաջինը մասնակցություն է ունեցել «Большой Советский Атлас Мира»-ի (Աշխարհի Մովետական Մեծ Ատլաս) քարտեզագրական աշխատանքներին. նա է կազմել դարձրոցական փոքր ատլասը, որ սպառվել է 2 միլիոն օրինակով, կազմել և խմբագրել է տասնյակ քարտեզներ։

Մեծ էր Շոկալսկու մասնակցությունը Ռուսական Պետական Աշխարհ-

հազարական Ընկերության աշխատանքներին: 1885 թ. ընտրվել է հիշյալ ընկերության իսկական անդամ: 1914 թ., Շոկալսկին ընտրվում է Ռուսական Պետական Աշխարհագրական Ընկերության փոխ-նախագահ, 1917 թ. նախագահ, իսկ 1931 թ.՝ պատվավոր նախագահ: Կես դարից ավելի, մոտ 54 տարի, իր բեղմնավոր կյանքի ամենահեռուն ժամանակը Շոկալսկին անձնավիրաբար տվել է Աշխարհագրական Ընկերության գործունեությանը: Այդ պաշտոններում նա ղեկավարել է էքսպեդիցիոն աշխատանքներ, կազմակերպել է գիտական նիստեր և ղեկուցումներ, խմբագրել է գիտական հրատարակություններ և այլն և այլն: Անսպառ էր նրա եռանդը:

1895 թվականից սկսած Յու. Մ. Շոկալսկին նախ Ռուսաստանի և ապա ՍՍՌՄ-ի կողմից անփոփոխ կերպով մասնակցել է Միջազգային աշխարհագրական կոնգրեսներին— 1895 թ.՝ Լոնդոնում, 1913 թ.՝ Հռոմում, 1934 թ.՝ Վարշավայում, որտեղ կարգացել է քարտեզագրության և օվկիանոսագրության մասին մի շարք արժեքավոր ղեկուցումներ, ցուցադրել քարտեզներ, ղեկավարել գիտական նիստեր և այլն: Նա Ռուսաստանի ներկայացուցիչն էր նաև գեոգեդիական և քարտեզագրական համագումարներում ու կոնֆերանսներում:

Յու. Մ. Շոկալսկին, որպես փայլուն մանկավարժ, մեծ մասնակցություն է ունեցել աշխարհագետների, քարտեզագետների, գեոգեդիստների, հիդրոլոգների, մետեորոլոգների կադրերի պատրաստման գործում: Շոկալսկին երկար տարիներ, որպես պրոֆեսոր, դասախոսել է Ծովային Ակադեմիայում, ապա Լենինգրադի համալսարանում: Նրա հետաքրքրական, պատկերավոր դասախոսությունները գրավում էին ունկնդիրների և ուսանողների մեծ մասաներ:

Շոկալսկին ՍՍՌՄ Գիտությունների Ակադեմիայի անդամ-թղթակից էր, իսկ 1939 թ. արժանացավ գիտական բարձր պատվի, Գիտ. Ակադեմիայում ընտրվեց պատվավոր անդամ: Նա թողել է 460-ից ավելի գիտական աշխատություններ:

Սովետական և համաշխարհային գիտությունը հավերժացրել է Յու. Մ. Շոկալսկուն, ղեռ ևս նրա կենդանության ժամանակ, Յու. Շոկալսկու անունով կոչելով՝ Հյուսիսային երկրում և Անտարկտիկայում՝ երկու նեղուց, Կարայի ծովում՝ մի կղզի, Կանին թ.-կղզում՝ մի լիճ, Պամիրում՝ մի սառցադաշտ, Ասիայում՝ մի լեռնագագաթ և Արևելիկայում՝ մի տաք ծովային հոսանք: